



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7



Model Rajkanya anogo
14 nü tepuokdak ayutsü

J&K nung tensa majungba ya
Centre ajanga lir: Mehbooba Mufti



VOL. XIX NO. 02 (ADOK 02) DIMAPUR KÜPTOKNÜ (SATURDAY) MONGPUTENI (OCTOBER) 09, 2021 ₹ 5.00

Tata Sons-i Rs 18,000 crore yong Air India alizüktsü

New Delhi, October 8, 2021 (Agencies): Mumbai nung amenoka aliba Tata Sons ajanga Air India alizükogo, ta Hokolbarnü Centre-i metetdaksü.

"Tata Group-i Rs 18,000 crores (\$2.4 billion) agi alizüktsü. Parnoki Air India alizükba den külemi Air India indang sentsüh Rs 15,300 crore menoktsü. Tanünga Rs 2,700 crore ji sorkar nem agütsüsü" ta Department of Investment and Public Asset Management Secretary, Tuhin Kanta Pandey-ashi.

1932 küm Tata Sons-i mezüng Air India Ltd. tenzüka liasü. Centre-i 2021 tatemlen tashi nung senotsü maparen tembangtsü nükjidong lir, ta Pandey-isa ashi.

August 31, 2021 tashi nung Air India indang sentsüh ajak agi Rs 61,560 crore liasü aser Tata Sons-i melemzükba sentsühji sorkari menoktsü.

Ajisüaka, iba tenanzükteper nung Air India indang non-core

assets (ali aser kiojen) maden aser Tata Sons-i tang Air India nung teinyakdakpurtem küm ka tashibo inyakdaksütsü.

Air India ket nung wide-body aser narrow body aircraft 117 lir. Külen, Air India Express Ltd. ket nung narrow body aircraft 24 lir, ta Tata Group-i sangdong ka nung metetdaksü.

India nung mezüngbuba licensed pilot JRD Tata-i tentetba Tata Sons ajanga 1932 küm Air India Ltd. tenzü. 1930s mapang Air India Ltd. ajanga British nung yimsüsüba India nung Karachi aser Bombay tsüngda shiditem belen.

1950s nung sorkari alizükba sülen Air India kanga nüngtugu aküm.

Tata Group atema Air India ya airline brand tasembuba lir. Parnoki AirAsia India aser Vistara (joint venture with Singapore Airlines Ltd.) nung shilem tulubalen alizüka lir.

2007 küm Air India-i Indian Airlines den loktepa sülen tajangzük mengui dang aruogo.

Nagaland CEO-i DEOs den senden amen

Dimapur, October 8, 2021 (TYO): Nagaland Chief Electoral Officer (CEO)-i tanü District Election Officer tem den video conference ka ajanga senden menogo.

Iba mapang Special Summary Revision of Photo Electoral Rolls indang jembitep.

Senden nung CEO den CEO indang office nungi ketdangsürtem aser district ajak nung District Election Officer tem aden.

District Election Officer temi pei nem lemzüktsüba mapa inyakba atema CEO V. Shashank Shekhar-i tenüngsang agütsü.

Election Commission-i pre-revision aser revision mapa inyakba repranger anungji ajaki mapang lateta aliba tsüngda inyaksüla, ta paisa ashi.

Senden nung Electoral Roll and Systematic Voters Education and Electoral Participation (SVEEP) indang onük benoka lemsatap.

FOCUS-Nagaland aser FAO külem senden amen

Dimapur, October 8, 2021 (TYO): October 8, 2021 nü Nagaland House, New Delhi nung FOCUS-Nagaland (Fostering Climate Resilient Farming Systems in the North East-Nagaland) aser FAO India (Food and Agriculture Organisation of the United Nations) ketdangsürtem senden ka menogo.

FOCUS-Nagaland tenüng nung Agriculture Production Commissioner & Mission Director, Y. Kikheto Sema, IAS aser FAO India tenüng nung Country Representative, Tomio Shichiri-i anir senden amen.

FAO-i FOCUS-Nagaland project yariba atema Y. Kikheto Sema-i FAO ketdangsürtem

dang pelaba metetdaksü.

Nagaland nung FOCUS project inyakba nung FAO-i yarir aser parnoki training balala agütsür.

Tanü Y. Kikheto Sema den külemi Jt Secy & SPD of FOCUS-Nagaland, S. Tainiu nati Joint Secy. Department of Economic Affairs, GoI, Manisha Sinha den ajuruteper.

Iba mapang tenati Manisha Sinha dang FOCUS-Nagaland project indang osang lemsatap aser IFAD nungi Advance Grant anguba indang jembitep.

Senden nung FOCUS project kübok district tasan asem- Noklak, Peren aser Tuensang dendaktsütsü nangzük.

Tatong Tir M. Venkaiah Naidu-i mapatong aika lapoktsüogo



October 8, 2021 nü India Tatong Tir, Venkaiah Naidu-i Dimapur Airport nungi apusoa aodang agiba noksa angur. (Dimapur, October 8)

Dimapur, October 8, 2021 (TYO): India Tatong Tir M. Venkaiah Naidu-i Nagaland semdangdang online ajanga ki aika lapoktsüogo.

Tatong Tir Naidu-i Directorate of IT&C building, Chumukedima, Diphupar, Zuheshe aser Mopungchuket nung Government High School kitem aser Minister's Residential Complex, Kohima lapoktsü.

"Terenlok aser azükaru alitsü atema yimjung nüngdaker aser temolung sadoka melira yimjung mengutetsü" ta Naidu-i ashi.

Paisa nübortem dang temai adoktsü aser ozüng alema meinyaktsü ayongzük.

"Centre sorkari India kümzüka ayutsü nangzuka lir aser linük kübok Nagaland aser northeastern state ajak densema lir. Arrrtsü, maitsü aser tanga onüktem olemtep agi lemtetsü koka lir" ta paisa ashi.

"Chief Minister aser pa den inyakeritemi Naga yimten tibelemtsü angatetteptsü atema

mapa inyakba atema tenüngsang agütsü. Yimjung maparen tejakleni odar aser telemtetba tajung ka agütsü imlar. Nisungtemi terenlok aser rongsen dang masü saka yimjung aser tepela aginür" ta Tatong Tir Naidu-isa metetdaksü.

Prime Minister-i aniba Team India aser Chief Minister-i anir State o village council tem külemi inyak nung dang terenlok alitsü, ta paisa ashi.

"Nagaland ya handicrafts nung takar lima ka lir aser mapa meranger inyakeritem lir. Wadang balala inyaka aotsü lenmangtem lir aser infrastructure development lira, tarutsü anogotem Nagaland kanga ajangzüktsü" ta Naidu-isa ashi.

"Nagaland indang nütsüng yongsük nung lanur arishi küm 15-30 tsüngda 30% lir aser arishi küm 14 teküpok alir 25% lir. Iba jagi Nagaland dak human resources tulu lir aser tangar den tokteptsü atema shisaliok nüngdaker" ta Assam aser

Nagaland Governor, Prof. Jagdish Mukhi-ia o jembidang ashi.

"India sorkari Samagra Shiksha scheme, mid-day meal scheme aser Right to Education amala school education department nung inyakba ajanga temelenshi tajung bener arutsü. School ki tasentem yangluba ajanga kaketshirtem ajangzüktsü imlar" ta paisa ashi.

Chief Minister, Neiphiu Rio-ia India Tatong Tir Naidu dang Nagaland semdangba atema pelaba metetdaksü.

"IT&C Directorate building lapoktsüba ajanga technology tsütsü tashi aittsü. Iba ajanga North East nung dang masü saka South East Asia atema Information Technology tongtipang tesem ka akümtsü" ta Rio-isa ashi.

Iba sentong nung mendenji Nagaland Chief Secretary, J. Alam IAS liasü.

Venkaiah Naidu-i Dimapur nung konung yipzükba sülen tanep 8:00 ako meta Dimapur Airport nungi apusoa ao.

Nagaland Governor Professor Jagdish Mukhi, Metsubo, Tovihoto, Medo Yhokha, Kashiho Sangtam nung dena MLA tem, Chief Secretary Jane Alam, Home Commissioner, Abhijit Sinha, DGP Nagaland, John Longkumer, DC Dimapur Rajesh Soundararajan IAS, Commissioner Police Dimapur, Rothihu Tetseo, IPS aser State protocol officer nungertemi pa meinoktsü.

COVID-19 Nagaland: 13 dak putet, 34 taneptsü angu & 1 asü

Kohima, October 8, 2021 (TYO): Nagaland nung Hokolbarnü nisung 13 dak COVID-19 putet aser parnok züngsema nisung ajak agi 31,410 kümogo.

"Tesüiba ghonda 13 tsüngda nisung 13 dak COVID-19 putet. Parnokji Dimapur nung 7, Kohima nung 3 Mokokchung nung 2 aser Phek nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 34 dak COVID-19 putet. Parnokji Dimapur nung 21, Kohima nung

7 aser Mokokchung nung 6 lir" ta paisa ashi.

Nisung 31,410 rongnungi 29,445 taneptsü nguogo aser ibaji 93.77% lir, ta paisa shisem.

Tang nisung 289 anepaludar aser parnok rongnungi 210 dak shirangba yimya kecha mali, ta Dr Kikon-isa ashi.

Hokolbarnü Mokokchung nung COVID-19 puteta alir ka asüba züngsema tasür ajak agi 669 kümogo saka parnok 15 dakbo tanga tashidak liasü, ta paisa metetdaksü. "Brihostibar tashi nung nisung 694,579 nem COVID-19 vaccine indang dose

10,96,592 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,943, healthcare workers 15,996, arishi küm 45 ser temapur 199,376 aser arishi küm 18 nungi 44 tsüngda alir 418,264 lir" ta paisa ashi.

"Vaccine agir rongnungi nisung 402,013-i dose anaprong agiogo. Parnokji frontline workers 47,584, healthcare workers 13,298, arishi küm 45 ser temapur 143,934 aser arishi küm 18 nungi 44 tsüngda alir 197,197 lir" ta Dr Thurr-isa metetdaksü.

Shamator-Chessore by-election nung Keoshu Yimchunger den tetokteper mali

Kohima, October 8, 2021 (TYO): Tuensang district kübok 58 Shamator-Chessore Assembly Constituency by-election nung Nationalist Democratic Progressive Party (NDPP) candidate S. Keoshu Yimchunger-i dang tokteptsü tenüng agütsüogo.

Hokolbarnü Keoshu-i Additional Deputy Commissioner

& by-election Returning Officer B. Henok Buchem nem election kulikakettem agütsü.

Keoshu ya NDPP candidate dang masü saka United Democratic Alliance (UDA) indang candidate lir.

COVID-19 agi shiranga aruba sülen July 1, 2021 nü MLA aser Information & Public Relations, SCERT and Village Guards

Advisor Toshi Wungtung ajungbena asüba ajanga iba menden tazüng aküm.

October 30, 2021 nü by-election agütsü atema nomination agütsüba anogo tatembang anogoji tanü liasü.

October 11 nü kulikakettem reprangtsü aser iba sülen ang S. Keoshu Yimchunger-i takok anguba osang sangoktsütsü.



Nagaland nungi wadang balala nung takok angurtem den Police House Chumukedima, Dimapur nung October 7, 2021 nü tangokba noksa ka nung India indang Vice President, Venkaiah Naidu aser Nagaland Governor Professor Jagdish Mukhi na angur.

DMC ajanga Cleanest Colony Competition 2021 osang sangdongogo

Dimapur, Mongputeni/Oct. 08 (TYO):

Dimapur Municipal Council (DMC) ajanga inyakba A Better Dimapur sentong kübok 'Cleanest Colony Competition 2021' tetendanger temi October 4, 2021 nü senden ka mena liasü.

Iba senden nung First, Second aser Third Quarter nung takok anguba colony tem yamai shimteta liasü.

1st Quarter (January, February & March)

Big Colony - Duncan Colony
Small Colony - Sifty Colony

2nd Quarter (April, May & June)

Big Colony - Nuton Basti Colony
Small Colony - Aokong Colony

3rd Quarter (July, August & September)

Big Colony - Lengrijan Colony
Small Colony - Niu Colony

Maneni iba tetoktepba nung tetendanger temi DMC kübok aliba colony ajunga müreka ayutsü ajungshi aser colony shia nungi sanitation committee ajunga dang nüburttem anir iba tetoktepba nung shilem agia mapang shia mürekmejuba maparen inyaksü ajungshia liasü.

Parnokisa nüburttem dang yimya tajung amshitsü aser senpet atema masü saka Dimapur tajungba kumdaksütsü atema inyaksüla, ta sangdong ka ajanga ashi.

Taküm criteria ter - jana bendenba, kilentzü aoba lenmang anepaluba, jana rongdokba, nüburt metzü meshiba tesem, nüburi shilem agiba, sanitation committee inyaksangshi, arem müreka ayuba,

tobacco free zone, kisü-jensüba agi lenmang menokdangba aser RST (Residential Sanitation Tax) menokba - nung ajemdaker tendanga liasü.

DMC kübok ward 23 aliba nung colony tila 73 aser colony tulu 22 lir.

Iba tetoktepba nung elimination round mali aser ita shia colony ajak nem points agütsütsü, ta sangdong ajanga ashi.

Colony tila aser tulu sasep nung mezüngbuba, tanabuba aser tasembuba jenjang angurtem nem senpet sen lakh ka, 30,000 aser 20,000 agütsütsü. Ajidang masü quarterly basis nung colony tila aser tulu nem senpet sen 10,000 agütsütsü.

Treasuries & Accounts ajanga metetdaksür

Dimapur, Mongputeni/Oct. 08 (TYO):

Departments Audit dak sendakba maparen ajunga

inyaksü atema Directorate of Treasuries & Accounts, Nagaland, Kohima kübok Joint Director Vitsulie

Motonyu shimtetogo, ta Principal Director, Treasuries & Accounts ajanga sangdong ka nung metetdaksü.

Mokokchung nung Motor Awareness Campaign tenzükogo



Dimapur, Mongputeni/Oct. 08 (TYO):

Mokokchung nung Motor Awareness Campaign ka October 8, 2021 nü Imlong Place Police Point, Mokokchung Town nung Divisional Forest Officer (DFO) Mokokchung, Dr. Sentitula, IFS ajanga tenzükja liasü.

Iba campaign mapang forest ranges/beats nung aliba putu

menden/JFMCs/BMCs tem ajurutsü, Amur Falcon aruba indang nüburttem nem metetdaksütsü, arem shiruru wazüka ayutsü indang nüburttem dang ashitsü, tesem balala sema jajaba arem shiruru wazüka ayutsü mechi tenokdangba aser temerenshi angatetdaksütsü aser book mart, pamphlets tem lemtsütsü.

Iba campaign yagi district

kübok sub-division ajunga ayimjemtsü aser Mokokchung nungi tenzükja Changtongya-Tuli-Mangkolemba via Longchem-Changk-Mangmetong-Longkhum-Ungma sema jajar Mokokchung Town nungsa tembangtsü.

Iba campaign ya Wildlife Week 2021 nungtem nung Mokokchung Forest Division ajanga ayongzükba alitsü.

Department of Economics & Statistics ajanga nenshia metetdaksür

Dimapur, Mongputeni/Oct. 08 (TYO):

State nung Registration of Births and Deaths Act 1969 aser Nagaland Registration of Births & Deaths (Amendment) Rules 1999 tajungtiba nung mapa kuma inyaksü mechi Registrar of Births and Deaths dang tsünglanglen agüja aliba ama inyaksü Directorate of Economics & Statistics ajanga metetdaksüogo:

1. Registrar ajaki fee mesüra sempet medeni iba mapa atema anepaluba register nung Section 8 mesüra 9 kübok agütsüba osang ajanga zülüoktsüla aser pa indang jurisdiction nung asoba aser asüba osang ajak kanga junga metetdaksütsü asoshi mera agütsüla aser tezülüoktsü tim zülüoka ayutsüla.

2. Registrar shia pa/la shimba local area nung office kaka alitsüla.

3. Registrar shia-i office kima kishi nung pei oshi nung office lapokba anogo aser mapang, pei tenüng tejangja zülüa yutsütsüla.

4. Suo Moto registration of events section 7(2). Registrar aliba tesem nung asoba aser asüba osang magütsü aliba tejangja metetsüla aser zülüoktsüla.

5. Record (Register of births, deaths and still births) tem jungjunga bendentsüla aser yangji (section 16, 19) tejangja zülüoka ayutsüla.

6. Supreme Court ajanga 2016 küm November ita civil writ petition (WP) No. 349/2006 dak sendakba nung obendang agütsüba ama centralized database of civil registration records tem bendentsü atema District Registrar of Births and Deaths & District Economics & Statistics Officers, Section 19(1) nem taruba ita tenzükger anogo pongu tashinung monthly

report agütsütsüla.

7. Births and Deaths Certificates mela-mela ngutettsü atema Registrar ajaki forms No.1,2,3,4 &4A, 5, 6, 10,11,12 & 13 ya pei office nung peria yua alitsüla.

8. Anogo 21 tsüngta osang agütsüra, Registrar-i senotsü memeshie Births & Deaths certificate agütsütsüla. Ajisüaka menur tenüng zülüokba atema tsünglanglen agüja aliba temerenshi ya amshitsü akok

(a) Sector 13(1) nung osang ya anogo 21 sülen süaka anogo 30 tsüngta nung agütsüra, registrar-i documents tem jangjashir late fee meshiba sülen agütsütsü akok.

(b) Section 13(2) nung, anogo 30 sülen süaka küm ka tsüngta osang agütsüra, notary public ajanga yangluba affidavit agütsüba sülen zülüoktsüla aser late fee meshitsü.

(c) Section 13(3) nung, ataloker küm ka sülen osang agütsüra, First (1st) class magistrate nungi totuyuba agütsüba sülen aser late fee agütsüba sülen ang zülüoktsü.

Urban & Rural area tem nung Registrar kati dang temalen shia aliba ozüng alema certificate agütsüba metetra Act nung aliba ama merenshitsü.

9. Registrar-i mapa junga meinyakba aser mapa senzükja yutsüba kanga süoki ia agütsü aser mashi mapang Chief Registrar mesüra pai/lai shimtsüba officer kati parnok appointment agientsütsü.

10. Iba Act dak sendakba nung Registrars ajungai pei District Registrar of Births and Deaths & District Economics & Statistics Officers den osangtsüsang agiteptsüla.

Registrar ajunga dang pei nem lemsüktsüba mapa ya ita shia shidak inyaksü totuyuba agütsüogo.

BJP Mokokchung District pur legal awareness sentong agi

Dimapur, Mongputeni/Oct. 08 (TYO):

Karyakartas ajunga nem legal education angatetdaksütsü nungdak ta ajiteta BJP Mokokchung District ajanga October 8, 2021 nü "Understanding IPC and Customary Laws" omen nung ajemdaker legal awareness sentong ka BJP Conference Hall, Mokokchung nung agia liasü.

Iba sentong tenzükja jembiba mapang, lanurtem nem tzüzüng-ozüng angatetdaksütsü nükjidong nung iba sentong ya ayongzük, ta BJP Mokokchung district tir, Imolemba Jamir-i ashi.

Iba sentong nung shisalen sayur Advocate Limanungsang

Jamir, Retainer Lawyer MDLSA (Mokokchung District Legal Services Authority) aser Advocate Mapujungla Pongen, lecturer, Mokokchung Law College and Prog Assistant, MDLSA liasü.

Sentong nung shisalen sayur Advocate Limanungsang Jamir aser Advocete Mapujungla Pongen nati 'The basic rights of an individual according to Indian law and village council Act' aser 'Consumer Rights' onük nung jembia liasü.

Iba sentong nung iarenla, General Secretary, Kisan Morcha, BJP Mokokchung onir liasü aser BJYM tir, Kongsakum Longkumer-i melepzüng o jembia liasü.

Model Rajkanya anogo 14 nü tepuokdak ayutsü



Guwahati, October 8, 2021

(Agencies): Guwahati nung okadak kati model aser taoba Miss India finalist Rajkanya Baruah anogo 14 nü tepuokdak ayutsü tetuyuba agütsüogo.

Assam police-i Bodbar nü Rajkanya ya tanaben apu. October 2 nü GS Road, Guwahati nung lai nisung 8 dak gari agi atsükba sülen ghonda 24 tsüngda la bail nung chioka liasü.

Brihostibarnü la Kamrup (M) CJM okadaki anir ao aser parnoki anogo ka police ket nung ayutsü temelaba agütsü.

Okadakisa Rajkanya Baruah indang driving license sota ayutsü tetuyuba agütsü.

Arishi küm 29 tain Rajkanya ya Bodbar aonung Dispur police station nung ayu aser idangji police-i la dang asüngdangya asü.

Hokolbarnü Dispur police-

isa iba ken o dak sendakba nung neurosurgeon Navanil Baruah dang asüngdangyaogo.

Rajkanya indang medical certificate nung Baruah-i sign asü aser iba sülen la mozü kidang anepalutsü anioka liasü.

Guwahati nung ozüngren nung mongin nisungtemi ashiba agi mozü ki aser neurosurgeon nungeri taila kulikaket agütsüba aser kulitem agütsüba atema merenshitsü akok.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Ajma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisüaka, tang **Kabiraj H. Umar Chesam** contact no. 8416087414 / 6909717178 National awarded H. Umar Chesam Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - **Soted, Add: Purana Bazar, Dimapur**



Ukhrul district nung nashishi ayokba noktanger

Imphal, October 8, 2021

(Agencies): Manipur nung NGO- Tangkhul Naga Long (TNL)-i Ukhrul district nung nashishi mayoktsü tenokdangba agütsüogo.

Ukhrul district nung nashi aser jang aika asüba sülen TNL-i iba tenokdangba agütsüogo.

District nung nashi tepseta mayoktsü ta parnoki metetdaksü.

Myanmar den arrtsüa aliba

Ukhrul district nung mejangjatetba tashidak ka ajanga nashi aser jang aika süogo, ta parnokisa ashi.

District ketdangsurtemi iba tashidak jangjatsü aser meta talang pilar aliba lisopurtem nem tesayuba agütsütsü mapa inyaker.

Iba district nung nisung aika tashidak ka ajanga shirangteper. Ajisüaka, Manipur kübok tanga tesemtem nungbo nashishi maneni ayoker.

Myanmar nung 24-i Aadhaar card bener lia apu

Guwahati, October 8, 2021

(Agencies): Manipur kübok Tengenupal district nung Assam Rifles sepaitemi Myanmar nung 24 puogo.

Indo-Myanmar arrtsü anasa Khudengthabi nung aliba Army checkpoint nung AR sepaitemi tetsür 14 aser tanur 3 dena Myanmar nungertemji apu.

Parnok ya Mizoram kübok Bulin Champhai nung alir kati anir Churachandpur district leni aodang apu. Parnok ket nung

taila Aadhaar card bena liasü.

Parnok nisung 24 rongnungi Myanmar kübok Mungswa nung 9 aser Butalen o Toyero nung 15 lir, ta police-i ashi.

Iba dak sendakba nung Moreh police station nung ken o ka benokogo aser Myanmar nungertem Foreigners Act kübok apu.

Taoba mapang Imphal Airport nunga Myanmar nung 11 apu. Parnoki taila Aadhaar card bener Delhi-i aotsü lia apu.

Shillong kübok Punjabi Lane nung alirtem anientsü

Shillong, October 8, 2021

(Agencies): Meghalaya Cabinet-i Punjabi Lane nung ozüng alema alirtem Them Lew Mawlong tesemi anientsü atema telemtetba agiogo.

High Level Committee (HLC)-i ashiba nung ajemdaker parnoki iba telemtetba agi.

"HLC-i Urban Affairs department dang iba tesem nung alirtem alitsü atema tesem tajung ka bushitsü metetdaksü" ta Chief Minister Conrad K Sangma-i ashi.

Iba tesem nung alirtem aser state sorkar mapa inyakertem pei pei department indang official quarters nung alitsü, ta paisa ashi.

"Urban Affairs department

dang lenmang ka bushitsü aser cabinet nem agütsütsü atema metetdaksüogo. Sorkari itemji asadanger telemtetba ka agitsü" ta Conrad-isa ashi.

Them Lew Mawlong nung ali kibur indang onük tongtipang lir, SMB, tanga department nung mapa inyakertem aser ozüng alema alirtem anientsü maparen lir, ta paisa metetdaksü.

Hima Myllem indang Syiem nungi state sorkar aser SMB-i ali agitsüba maparen tenzüko, ta Conrad-isa ashi.

"Hima Myllem indang Syiem, Urban Affairs aser SMB tsüngda tenangzüktep ka nung sign süogo aser hopta ka tsüngda ali ajunga sorkar keti arutsü" ta paisa ashi.

HLC-isa Bishop Cotton road

nungi SMB office belentsü atema shiogo. SMB nung mapa inyaker tang Sweeper's Colony nung alirtem official quarters-i anientsü atema parnokisa metetdaksüogo, ta Meghalaya CM-isa ashi.

Kibong 57 shi aliba nungi tesadang kati Sweeper's Colony toktsür ogo ta paisa shisem.

Shillong Municipal Board-i inventory report agütsüba nung kibong 184 tashi ozüngi melartem ta jangaogo.

Iba nung SMB mapa inyaker kibong 128 aser sorkar department balala nung inyaker 56 lir.

Ajisüaka, iba tesem nung alir Harijan Panchayat Committee (HPC)-i tangaleni aotsü memolungba metetdaksüogo.

Taoba Congress MLA Mairembam Prithviraj-i BJP nung denogo

Imphal, October 8, 2021

(Agencies): Manipur kübok Moirang constituency nungi taoba Congress MLA Mairembam Prithviraj-i Bharatiya Janata Party (BJP) nung denogo.

BJP Manipur President Adhikarimayum Sharda Devi aser State Prabhari Dr. Sambit Patra na lia Prithviraj-i BJP nung aden.

Iba sentong nungsa MP and Election Co-Incharge Pratima Bhoumik, MLA Moirang AC P

Sharat, MLA L Sushindro Meitei aser tanga party lennirtem aden.

"Moirang constituency nungi taoba MLA Mairembam Prithviraj-i Bharatiya Janata Party (BJP) nung denogo" ta Manipur Chief Minister Biren Singh-i osang metetdaksü.

PM Narendra Modi lenisüba aser Sabka Saath, Sabka Vikas, Sabka Vishwas alizüng nung tamang kaa nisung aikati BJP nung adener, ta paisa ashi.

Tripura nung ex-youth Congress president-i party tasen tentet

Agartala, October 8, 2021

(Agencies): Tripura Youth Congress president Pujan Biswas-i political party tasen ka tentetogo.

Tripura Pradesh Congress Committee (TPCC) nungi telok ka lokzüka orr Tripura Democratic Front (TDF) ta ser party tentet.

TDF-i Pujan Biswas tir inyaksü shimogo.

TDF-isa taruba assembly election nung Tripura chuba jabaso Pradyot Manikya-i aniba Tipraha Indigenous Progressive Regional Alliance (TIPRA) yaritsü metetdaksüogo.

Pujan Biswas ya taoba TPCC state president Pijush Kanti Biswas'er jabaso lir.

Central leadership-i tesüiba küm ana tashi state nung party ulushitsü atema teyari magütsü ta tai tonglokja taoba hopta tu Pujan-i party nung anena liasü.

Pijush Kanti Biswas-i president menden nungi anenba den külemi lennir tejen Tapas De-ia party toktsüogo.

Congress central lennirtemi parnok dang CPM anema menokdaksü meranger ta tai tonglokja parnoki party toktsü.

Pijush Kanti-i anir tangartem TDF nung denogo.



Hokolbarnü Mizoram kübok mozü ki balala nung pressure swing adsorption (PSA) oxygen plants 13 tashi amenokogo. Iba mapang Prime Minister Modi-i video conference ajanga Serchhip district hospital nung PSA oxygen plant lapoktsü. PM CARES ajanga teyari agüja yangluba oxygen plants ya Mizoram nung district hospitals 9 aser Aizawl nung Zoram Medical College (ZMC) o Mizoram State Cancer Institute (MSCI) dena hospitals 3 nung amenok.



TIR YIMYIM YIMOBILEM (EDITORIAL)

DIMAPUR

KÜPTOKNÜ

OCTOBER 09, 2021

Nagaland nung alu junga ayimer

Tanü Nagaland nung takok ngua inyakba mapa kaji aonsutsü aser süngjanglijang lu ayimba ya lir. Iba mapa ya, talisa, India government-i Mission Organic Value Chain Development for North Eastern Region (MOVCD NER) sentong ajanga Northeast India nung aluyimertem nem mozü mamshii pei lima nung junga yimtettsüla aonsutsü aser süngjanglijang lu yimdaktsüba ajanga ataloker. Tanü alima nung nütsüng onsara, anungji nisung ajak tebok sünga chiyongtettsüsa tekaraba nung tuluba aser teimba züsentettsü atema mozü amshir. Iba jagiang nisung ishikati alu ayimba agi linük nung nisung ajak perir anüngtsüsa züsentetter. Iba alima nung nisung ajak peridaktsütsüsa alu ayimba mapa nung takok otsü lir, ashi, asen lima nunga ayawara manenla aser asenoka ayaba agi aika sür lila. Ajisüaka, temang atema majung kaji, mozü amshia ayimba lu nungi züsentetba jang, aonsutsü, süngjanglijang aser kiset shirurtem shi ya lir, kechiyong aluyimba mapang chiyongtsü teimba aser tekaraba adokdaksütsü atema amshiba mozütem ajak to chiyongtsü nung keter aiener aser asenoki itemji chisemer aser itemji asen temang nung tashidak akümer. Ibayongji, akok tashi mozü mamshii ayimba 'organic' chiyongtsü züsenteta achitsü ajungshir. Ajisüaka, mozü tak ta mamshi aluyimtsübaji tasak, ai makoktsü aser aika mezüsentettsü, anungji mozü mamshi ser züsentetba chiyongtsütem jenjangji mozü amshia züsentetba chiyongtsütem dang nungi kanga agia tasakba meshir. Tepilaji, mozü amshia züsentetba chiyongtsütemji tashidak saka mozü mamshii züsentetba chiyongtsütemjibo mozü lir. Aluyimba nung asen akhi tsüraburtema 'scientist' amai liasü, parnoki kodang kechi tsünütsü aser kechi koma chiyongtsübo machitsüla aser koba chiyongtsübo achitsüla, item ajakji meteta liasü. Item rongnung parnok dak aliba tashitemetet kaji, aonsutsü koba nungsa mesen aser longben agi achiba tarak keta lir, itemji asenok meimchirtem asoshi chiyongtsü tajung liasü saka aonsutsü koba nungsa tarak maket, itemjibo tereprangtsü nung topur junga nguaka temang asoshibo majung liasü, anungji machi. Iba tashitemetetji tanü asenoki bazaar nung aliba aonsutsü aser süngjanglijang den medemdangra, aonsutsü aser süngjanglijang ajakji tarak maket prangpranger, tang ongzükli aser yatazükli amato angutsü. Asenokibo, itemjiang tajunga ta bilema shimashima alir saka shitakba nungbo item aonsutsü aser süngjanglijangtem nungji miim mozü aliba agi mesen aser longbentemia machir. Aji oda, temetetertemibo temang anema alitsü asoshi bilema aonsutsü aser süngjanglijang nung tarak aketba shima alir, tetezü mozü mamshii züsentetba organic chiyongtsü bushir. Iba nungdakji reprangteta asen lima nunga Agriculture aser Horticulture purtemi MOVCD sentong ajanga tesem balala nung ali aser tzü mopong dak apet aonsutsü aser süngjanglijang tapu balala shimteta aluyimertem nem mozü mamshii alu yimdaktsür aser aluyimertemi züsentetbajia parnoki tayokdak bushia yoktsür. Iba sentong ajanga tangbo mapang mapang shia Nagaland nungia organic chiyongtsütem tayimtsü nung tangaleni bener yokba osang asenoki angashir. Item rongnung yakanü Kohima, Phek aser Zunheboto len züsentetba kiwi süngjang seret 600 Horticulture department-i yaria tayimtsü nung Delhii yokba osang asenoki angashiogo. Ibaji tetenzüker ser tang nungi December ita tashi nung, Nagaland nung kiwi lu ayimertemi kiwi seret lakh asem züsenteta yoktsü teimla lir. Iba jagi Naga nung aluyimertem takar akümtsü aser alimaia Nagaland metettsü. Aji oda, kodang aluyimertem aluyimba nungi takar kuma ngudir, Naga nung lanurtem aikati aluyimtsü jangratsü aser Nagaland ya alima asoshi chiyongtsü züsentetdak kuma adoktsü. Kiwi ji dang masü saka Nagaland tesem aika nung organic aonsutsü aser mersü lu, süngo lu, somomo lu aser süngjanglu takok ngua yimdagi. Joko, Nagaland nung teinyaktsü mapa maka ta ser kazütsüba mapang to süiogo. Atangji, meinyakner atemabo kecha teinyaktsü maka saka teinyakner atemabo mapa inyaker meinyakma lir aser tanü tensa Naga nungertemi kanga temulung agüja inyakba mapa kaji aluyimba mapa kümogo. Atangji, tanü dang masü saka alemli nungi Naga nungertem ya aluyimer kin, anungji aluyimtsübaji asenok shi azü dak keta lir aser alu junga yimtettsüsa Tsüngremi ali aser tzü moponga moaja lir. Asen tsürabur mapang tekong nung tsük lu ayim tashi aonsutsü aser süngjanglijang yabo jenjang makaba chiyongtsü amato züngshi, anungji angati dang lemshia achi aser yokdi asüyonga tayokdaka maka liasü. Tanübo asenokia aonsutsü aser süngjanglijangtem alia achir aser tayoka ayoker. Iba jagi tanü aluyimertembo sensaker masü takar akümer.

OLEMSABANG

Peleteppang, Pelateppang, Kibur sangang

Süpongünöngsang Longkümer, Darogapathar Dimapur

Naga hills ta ajaba mapang Dec. 1950 ita nung A. Z. Phizo NNC President shimteter külen pai Naga lima yimtsüng ajunga tang Nüjisu agitsü magitsü, mulunger memulunger ta asüngtanga jajar ajaki mulunga nangzük nung May 16 1951 meyong nem (Plebiscite) nemer Kohima donga oa agütsüba NAGA NÜJISU TONGPUPURTEM kaket tapak 45 nung angutsü. Iba Naga lima nüjisu akangba tetenzüker kuma taküm agi taküm maja rishikangshi aser tepseta 1957 nungpo yimtsüng ka nung yimtsüng pungu trok meindena shibanger rishikangshi, aser yim rongdoktsübaji tamamatsü tako lir. Yamaji ataloka arudang Feb ita 1964 küm Naga lima nung mezüng election aglba küm NBCC mongdang ajanga India den yimjung yanglutsü Peace mission luden ka tentettang ta anongba ama Nagaland sorkari India sorka rden jembia Sept 6th 1964 India den yimjung lapok. Iba küm Ungma yimdak meta ka tenüng agi Azü nükjang lir, yangji Sorkari telong nung alir atema Brigade camp ka lapoktsü mela. Pakümüji telong nung alirtem Christmas sentong nung shilem agitsü jaokba ama 24th dec aonung ken ka atenba "PELETEPPANG PELATEPPANG KIBUR SANGANG IBA KÜMI NINETEN SIXTY FOUR (1964) ta, ano parnokisa Putu majung putu majung ta jembir saka, saka masü putu majung masü nisung majung ta atenba bilemtefer. Koda temunungratsü. Küm ti shi sünepba lia arudang tibilemba mataloktetba agi Naga lima mepetmesü tali aküm nung Sept 1st 1972 yimjung tempanga adok, ajisürpo nüjisu pushir telok aika kuma tenzük. Iba mapang telong nung alirtem tanüpo aika malitsü südi. 1976 küm tetenzüklen Arogo asentenshi tulu adoka Ao lima tang masü Naga lima aser ateta oa asentenshi milak Tsüngremi yok, iba mapang temulung meyipbertem aika kotaki or alitsü ta amanger. Saka iba sülen Naga nung kin aika nung Arogo aika raksa razüka oa adok iba ten bei meten aika lapoka tenzük.

Küm ishika Arogotem nung asentenshi sentong kanga agia arur saka Temishi tanüla kangapo mekongshir amai ajiteter kechaser ochi mashi mapa jendi kumaogo, Government tetenzükertemi alima tenzükter masü bei agitsü tenzükter, kibongtem nung, lokdi nung, temeim mekongsa kuma adok. Arogo nung züru (Telümsa) mali yamaji arudang Covid 19 tashitak agi tenlaki, school, collage ajak shibanga adok. Iba yagi lanurtem asu ka raksatsüdade. Tashidak ka agi alima rangpen makyonga atalokba ya a tesüngmangtsüka; JA 6: 2 b nung shia aliba ataloker mesük. Tsüngremer mapangdong ka atalokdong Mat 25: 1-10 Tasüngtet aiür terji kotak yimli nung kibur kiyimsang lenji aotsü asoshi milen renemba mesük, saka aiür pungupo milen nung tang totzü apen ashe takyi nung totzü mapen milenasep; parnok tamangji tangutsü tang ashe ternemba tamang mali, parnok asoshi kishe shibanger. Aiür punguji tangutsü nung tamanger aser mapa-a tamanger kechi arudir tetsüpu mali Tsüngrem tsüngdang temeden parnok asoshi kishe lapoka lir. t 6 kiyimsang den ajuruteptsü arung ta ayaterem nung ola adok; Kanga ayipjanga mejanga ali mapang tetezü tetsüpu tatenten agi atsüngzuka ali mapang südisü? Taochi anguba bendanger telok ka JA 7:9 Kin ajak nungi telokti; Kin, kidong, Nüpur, aser oshi shia nungi süpütsü temesüng süpurtem parnok dang bendanger ta ajar. Bendangertem ya Israel nung merenshi mapang metendaktsütsü agina atatsü, temeshipurtem, leper nung alirtem ajak shia arua ayipba tura taküm aliba temeshipur ka tanga anünga meyutsü ayipba pener aotsü totzü mapenba aiür pungu jagi jangjatsür. Mar 13: 27 Teshimetba purtem JA 7: 1-8 Alima dang Tsüngrem sendong nung tateshitsü kuma amshitsü shimteta kin küm tenet tatempang, küm asem sür tesadang nung, parnok anitetsü lji nung merenshi ter agi merenshiba ama Israel nung merenshitsü JA 11 nung angur. Kechaser parnoki Yirusalem nung Yisu rishikangshia kangki nung tepsetba ama merenshitsü kechaser parnok dangi Tsüngrem jongkai adokbaji kodanga amatsü makokba sendong liasü. Saka iba mapang mesü aliba Israel nung ajak kümzüksü aji sür küm meyi ka Yisui yimsütsütsü tenzüksü JA 19:11-16 nung jangjatsü Tsüngrem dak amangerterem, süngyanglu külemertemi rishikangshia tepseta endoker nung Tsüngrem ain adoka rasa mapang alima rishikangshi tang ano pa dak amanger a temerenshi jagi südaktsü Pa dak amangba temaitsü kechi asütsü? T ken 55:22. Nung angutsü. Temeshipurpo masütsü ta mali par mapang dong ka asü. Temulung meyipba Yisu khrista dak amanger ajak pai kümzüksü ta tongmelangagi zülur. Tamang agi peleteppang, peleteppang Kibubai kümzükter pa sangang Amen.

Yashi, Tanü aser Asüng Ao oshi jenjang

Rev. C. Walu Walling (www.nokinketer.com)

(Yashi adok nungi...)

Tasembuba nung Asüng Ao oshi Jenjang:

2021 -- dangji Asüng Ao Oshi jenjang ta ajatsü akok. Yashi aser Tanü Ao oshi jenjang asadanga nungi asüng kechi inyaktsü ta tanü bilemdangtsü ya mapang tajung. O ka nung Yashi aser Tanü Ao oshi wadang nung shilem agirtemi pei pei tashi yari kanga meranga inyaka yutsüogo. Parnoki iba tashi ya danga inyaka meyutsü asübo asüng Ao oshi koba lenmangi ola.

Asüng Ao oshi atema tanü asen nükla aser mangdang kechi asütsü? Ao oshi terenlok mapa ya nisung ishika mapa dang asütsü asü, Ao oshi jembir Aor ajak mapa asütsü? Sentep kidang sayutsüngiba jangratema angar sentep temerbo ato kechisa jembiakana ta asüngdang nung ajak amadokogo ta langzü medem, tanübo temulung ajak jamesoa runga atua dener asüng kechi inyaktsü ta asüdangbo tashitsü kecha maka ama masütsüsa, ajaki langkabosa lemsatepba agi dang asüng Ao oshi lendi kati pungtettsü. Tebilemdangtsü atema tongmelang agi kar:

Mezüngbuba nung, Ao oshi University tashi nung agitetsüsa lenmang bushiteptsü Aor ajak nükla aser mangdang asütsü tenüngdaksü ta ajiteter. Tangar jilo ajizüka benshitsüba dang nungi aseni asen oshi atema sentong tajung asameyanga inyakdi süra lenmang sadema kar ta bilemer. Kodang iba mapa ya takok ngua odir, idakji sentakba teinyaktsü jenti adoktsü.

Tanabuba nung, Ao oshi kenozülü dak sentakba ngua aser angashia aliba dang nungi kanga agi tali aseni mangashiba aser mangubatem ajak tatongi bendena rizüngtsü, tetsür aser tebur teka mapatem koba tanü putui mangazükter/meinyakteter, itemji tanen makai angazükdakja, pei sobaliba takar küm daksütsü atema tang alir tantsü-tambutem dang asüngdanga parnoki inyakbaji menüngoka yur mapang balala nung sayutsü, aser itemji class balala nung agitsü kaket adoktsü.

Tasembuba nung, asen nisungtemi züluba kakettem, züluyutem, takok tashi bendena Kaketnang tajung ka nung rizüngtsü. Otsüolem tsütsü osetzü tapu balala bendena kaket kuma adoktsü. Akhi tsüraburtemi amshiba oset-tsüset bendena Osetjenri nung yur alima dang sayutsü.

Ao kin Jungli Mongsen tetsür aser tebur sobutsü bendena sayu taktang nung bendentsü. Ao kin sobaliba aser loktiliba; Yimdenyimli yimsütsüba tarensen; akhi tsürabur yimsü aser amenbong; takar mapa aser arrür den raraba a.a. ta item ajakji tatongi bendener kaket yanglur class telemsa balala nung agitsü. Itemji mapa kuma inyakdi süra tang ASBL ta aliba ya tapet Academy tenüng ka jateter inyak nungdang takoktsü asütsü. Kechiaser iba Academy nungjibo lenla ajak nungi züngsem tabensa shimer mapalem balala lemsar inyaktsüsa akümtsü. Iba ya Ao kini mapa küm teta inyak nungbo lanur aika toklang tenzükba mesüra mapang taktet yur inyaktsüsa akümtsü. Yashi aser tanü Ao oshi asen lenirtemi iba jenjang tashi anir arua yutsü süra, asüng Ao oshi atema tangatetba tajungtiba agi pei tetsü oshi lentiti nung jajadaksütsüsa telemtetba takang agir mapa inyaktsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung Hindu nungertemi pastor asem dak azük



Chhattisgarh yimtiba, Raipur nung aliba police station ka nung Hindu nungertemi lokti kati pastor asem dak azükba noksa nung angur.

New Delhi, Mongputeni/October 08 (Agencies):

Taoba ita Hindu nationalist telok kati Chhattisgarh state yimtiba, Raipur nung aliba police station ka nung pastor asem dak azük aser police ketdangser kata merenshia liasü.

September 5, 2021 nü Raipur nung aliba New Life Fellowship Ministry nung tekülem sentong tagidak mapang nung police van ka nung Hindu nationalist 10 densema police ketdangsertem arua pastor Harish Sahu Purani dang Basti police station-i arung ta tuyua liasü.

"Parnok aruba mapang nung onok tekülem sentong tagidak liasü. Police-i kü dang na kechi inyaker ta asüngdang. Ni parnok dang, temeshi kakat nungi Tsüngrem O lemsateper ta ashi," ta pastor Sahu-i metetdaksü.

"Hindu yimsü alia amangertem jagi Tenla ki telungi aittsü merang saka police-i parnok nokdang. Iba sülen police ketdangser ka Tenla ki telungi aika tekülem sentong agiba video tangok, noksa kar tangok aser kimai lua tangartem

dang sayu," ta pastor-i metetdaksü.

Iba sülen Police-i Pastor Sahu dang police station-i arung ta tuyu, ajioda nikongdang pa den pastor ana, Chhattisgarh Christian Forum general secretary Ankush Bariyekar aser Prakash Masih nungter police station tonga ao. Iba mapang nungji Hindu yimsü alia amanger nisung 200 shi police station kima adenshir Khristantem anema yimyim ayima liasü.

Police-i pastor asem dang asüngdangyaba mapang nung Hindu nungertemi loktiji station telungi aita tsüngsem agi parnok dak azük.

Station House Officer Yadumani Sidar-i loktiji nokdangtsü merangba mapang nung police kar arusema loktiji kimai minzüka yok.

Police-i pastor asemji nikongdang 5:00 ako tashi police station nungi mechiok aser Hindu nationalist 10 anema ken o benok, ta Investigating Officer Nitish Singh Thakur-i metetdaksü. September 6 nü police-i Hindu nungertemi ana apu aser September 7 nüa ka puogo,

tanüngba Hindu nungertemijibo mangur, ta Thakur-i metetdaksü.

September 6 nü apuba nisungtemji BJP youth wing-Bharatiya Janata Yuva Morcha (BJYM) nungi züngsemtem lir, ta osang ka ajanga metetdaksü.

"Manish Sahu aser Sanjay Singh na Raipur nung tesem balala nungi apuba sülen court ket nung agütsüogo," ta Raipur Superintendent of Police, Ajay Yadav-i metetdaksü.

September 8 nü BJYM züngsemtemi Purani Basti police station longbanger BJYM züngsem anaji tangsa chiokang ta takhangba agütsüdang police aser lokti tsüngda rara adoka liasü, iba sülen September 11 nü BJP-i longkak aitba sentong ka agi. Longkak aitba sentong nung shilem agirtem rongnung taoba mapang Chief Minister Raman Singh-a densema liasü.

Coronavirus wara anema tenokdangbatem aika agienba sülen state nung ano maneni Khristantem tekülem sentong tagidak mapang nung timtem agütsüba kanga bulua kümogo, ta Pastor Sahu-i ashi.

China nung Audio Bible ayokba atema tamalen pua alir ka chiokogo

October 08, 2021: China nung audio Bible company ka nung inyaker Khristan ka tamalen pua liasü saka tawa la bail nung chiokogo, ta International Christian Concern (ICC)-i metetdaksü.

October 1, 2021 nü sorkar ketdangsertemi Han Li nikongdang bail nung chiokadok. Tesülen Huang-i Shenzhen City Bao'an District Detention Center nungi la bail nung chiokba osang metetdakja liasü.

Life Tree Company anema benokba ken oji mapang talangka angadanga aruba sülen July 16, 2021 nü obendang agüja liasü. Iba company nung receptionist, Han ita 15 tepuokdak ayutsü atema o bendang agütsü.

Han indang attorney, Yang Hui-i taküm February ita nung

Han atema ken o jembitsüba anena liasü, kechiyong pai Khristantem aser Hong Kong nungertemi alirtem pusama inyakba ajanga Communist sorkar ketdangsertemi pa anema inyaka aru. Yang-i jail nung alisang pastor John Cao aser Hong Kong activist 12 atemaa ken o jembija aruogo.

Attorney tasenba, Huang Derqi-i Han indang ken o agizük aser lai aibelena mali, kechiyong lokti nung timtem adoktsüsa lai kecha inyaka mali, ta ashi.

July 16, 2021 nü Bao'an District nung Procuratorate-i, Han tepuokdak ita 15 ayutsü obendang agüja aliba nungi temerenshi ita 12 ajema kümtsür iba denji külemi senchi achitsü, ta metetdaksü, ajisiüka district nung People's

Court-ibo la ita 15 abensa tepuokdak ayutsü aser yuan sen 10,000 senchi achitsü, ta metetdaksü.

China kübok Guangdong province nung Han den külemi Life Tree Company nung inyaker Khristan asem- Fu Xuanjuan, Deng Tianyong aser Feng Qunhao nungertemi yaküm July 2 nü pua liasü. Parnoki ozüng alema audio Bible players ayok, ta aija liasü.

Yaküm October 23 nü mezüng parnok aija obendang agüja liasü aser iba mapang nungji Fu küm pongu tepuokdak ayutsü, company supervisor Deng küm asem tepuokdak ayutsü, technician Feng küm asem tepuokdak ayutsü aser receptionist/accountant Han ita 18 tepuokdak ayutsü, ta obendang agüja liasü.

ANO GO ABEN TSÜNGREM DEN

Khristai ka kümdaktsü

"Kechiyong Khista shibai Yihuda nungertemi aser Bendanger anaji ka kümdaktsü aser tetsüngda nung aliba balala kümdaktsüba jara raksatsü, aji asen yimjung." Efesa 2:14

Alima otsü tatalokba rongnung German nungertemi jara laoba ya ka lir. Küm aika East aser West tsüngda rasatepa arur 1961, 13 August nungi tenzüka East puri parnok yongtsü nung tenokdangtsü jara yanglur küm metsürti (28 Yrs) lia arur 1989, November tuko (9) nung parnok iba jaraji raksaa tanaben Germany lima ka küma yanglushir aoba angur.

Mezüng Arogotem nung tebilemstü adokdaksüba rongnung Yihuda nungertemi parnokji dang Tsüngremer nübur aser tanüngba ajakji 'Bendanger' ta aiben mezüngshi-a aruba angur. Iba tebilemstü kasa jagi Efesa Arogo nunga amangbapur rongnung tesendaktep raksar aliba mapang ka nung tenyar Pauli parnok dang Yisu Khristai Pa taküm rangben tenlaba ajanga shirnoki iba dakji au ta agizüka amanger parnok asoshibo joko kati ka tsüngda anemtepa aliba jaraji raksaa Khrista ajanga ka dang küma longjemdaktsüogo ta ashiba angur.

Temeim amangbapurtem, na aser ni adianu kar den langka nung danga tesendaktep raksar temeim aser yimjung nung meliteti lira, arung Khristai Pa taküm tenlaba ain tashi ajanga yanglutsüba taküm nungji jajadi.

SARASADEM

Kibuba Yisu, ni adianu kar den tanga temeim mesayuteti tesendaktep raksar lira, yanglushidi Nai kü dang taochi sayuang. Amen

New Jersey nung pastor ka gari agi tsükset



Pastor, Israel Razak Adebayo

October 07, 2021: Taoba Hokolbarnü (October 1) New Jersey nung pastor kati par medemer ka meyong gari yanglushitsüba mapang nung gari kati pa tsükset.

Arrshi küm 56 pastor, Rev. Israel Razak Adebayo ya Irvington nung aliba Christ Glory International Ministry nung youth pastor liasü. Hokolbarnü Newark nung aliba Somerset Street nung pastor-i par medemer ka meyong Nissan Altima gari yanglushitsüba mapang nung Dodge Charger gari ka kanga kera aruba sülen Nissan Altima gari dakji tsükoktsü.

Pastor Adebayo mejungi yiruba sülen nikongdang 2:55 ako meta asü, ta Acting Essex County Prosecutor, Theodore N. Stephens II aser Newark Public Safety Director, Brian O'Hara nati osangbener nem metetdaksü.

October 8, 2021 nü Arogoi Easton nung aliba Gethsemane

Cemetery nung pastor den asüpila sentong agütsüogo aser maneni tarutsü nung Christ Glory International Ministries nung pa nungtem nung sentong ka agütsü aser iba sentongjibo online ajanga live sayutsü.

Adebayo-i kinüngtsü den jala pezü toktsür asü.

Christ Glory International Ministries Facebook page ajanga par kinüngertemi, "Iba ama mangyim mapang nung nenoki ozü kibong nungita yariba atema onoki kanga pelaba lemsateper," ta metetdaksü.

Pastor kibong yaritsü atema GoFundMe online fundraising campaign ka tenzüka liasü aser October 7, 2021 tashi nung US dollar 19,316 bendentetogo.

Facebook post ka ajanga Christ Glory International Ministries-ia Khristantem dang pastor kibong atema maneni sarasademjang aser tenla agüjang, ta mepishia metetdaksü.



Srinagar, October 08, 2021: Brihostibarnü Srinagar nung kiralongrartemi sorkar school ka nung principal, Supinder Kaur khasetba sülen Hokolbarnü Srinagar nung Singh nungertemi la tasü mang bener longkak aita jajaba noksa nung angur.

UP sorkar inyakyim agi onok melung masür: Supreme Court

New Delhi, Mongputeni/ October 08 (Agencies): Hokolbarnü Supreme Court-i, October 3 nü Lakhimpur Kheri nung rara atalokba dak sendakba ken nung Uttar Pradesh sorkar inyakyim agi onok melung masür, ta metetdaksü.

Supreme Court-isa UP sorkar dang, iba ken o nung tai tonglokja alisang, Ashish Mishra kechiba tang tashi mapur?, ta asü ngdang.

Ashish Mishra ya BJP MP aser Union Minister of State for Home Affairs, Ajay Kumar Mishra'er jabaso lir. October 3 nü Ashish Mishra indang gari agi aluyimertem menü ngset, ta pa nem tai tonglokja lir. October 7 tashi nung police matsü ngdangi arutsü Ashish Mishra dang tuyua liasü saka tang tashi police matsü ngdangi marur.

Chief Justice Ramana leniba nung Justices- Surya Kant aser Hima Kohli nungeri akü mba bench-i, tai tonglokja alirtem anema Uttar Pradesh sorkari tim teinyaktsü meinyaker; Lakhimpur Kheri nung nisung ti asü ba ya taochi makai tepsetba lir, anungji ozü ng nung ajemdaker tai tonglokja alir ajak anema inyaktsü la, ta metetdaksü.

Supreme Court-isa Uttar Pradesh sorkar dang, state nung nisung tepsetba tanga ken otem nunga tai tonglokja alirtem apur asü tejaok ang jaoker, ta asü ngdang.

UP police-i Ashish Mishra mapubaji ajanga tatishitsü tamajung ka tenteta yutsür, ta SC-i ashi.

Ano kü len October 7 nü Uttar Pradesh Chief Minister, Yogi Adityanath-i, "Democracy nung raratsü atema tesem mali, aser kodang nisung ajak kü mzü ktsü atema ozü ng ka lidir iba ozü ngji pei ket nung mamshitsü la," ta jemba liasü.

State sorkari Union minister'er jabaso, Ashish Mishra kü mzü ktsü meranger, ta tai tongloktü ba dak sendakba nung Yogi Adityanath-i, "Iba ama video ji mali. Nisung kar ket nung kuli lira upload sü ang. Ajakji jungkai adoktsü. Ajak nem ochi temeden agü tsü tsü. Shinga ket nung ozü ng mamshidaktsü tsü saka rongshiba nung ajemdaker onoki meinyaktsü. Tai tongloktü ba nung ajemdaker onoki shinga maputsü, ajisü aka kari aibeleni lira paji shiba sü dir sü aka tai matoktsü," ta metetdaksü.

Supreme Court-i Uttar Pradesh DGP danga iba ken o dak sendakba nung kuli ajak kü mzü ka ayutsü la, ta tuyuogo.

SC-i maneni iba ken o ya October 20 nü angadangtsü aser ibaji masü dang state sorkari teinyaktsü ajak inyaker alitsü imlar, ta metetdaksügo.

Lakhimpur Kheri nung aluyimertem longkak aitba sentong tembangba sü len senshidang rara adok aser nisung ti asü. Iba ken o

bushisü ngdangtsü atema Commission of Enquiry ka tentetogo. Iba ken o bushisü ngdangtsü atema Uttar Pradesh sorkari taoba mapang Allahabad High Court nung judge, Pradeep Kumar Srivastava shima ita ana tsü ngda iba ken o bushisü ngdangtsü tuyuogo.

Nisung ti asü ba atema aluyimertem Union Minister of State for Home Affairs, Ajay Kumar Mishra'er jabaso Ashish Mishra nem tai tongloktü sü go. Parnok timbaka Ashish Mishra indang gari agi menü ngset, ta tai tonglokja liasü.

Mahindra Thar gari kati longkak aiter aluyimertem dak tesü len nungi tsü koktsü ba video balala social media nung kanga prokshio go. Ajisü aka Minister aser par jabaso natibo parnoki aibeleni mali, ta ashir.

Nisung tepsetba atema Ashish Mishra den tangar nisung 20 anema benoka lir.

Hokolbarnü a Union Minister Ajay Mishra-i, par jabaso i aibeleni mali, aser pa temang majungba ajanga tanü police-i jaokba ama moutet saka asü ng aotsü, ta metetdaksü.

Osangbenertem den jembidang Ajay Mishra-i, "Onoki ozü ng dak tamang akar. Ozü jabaso i aibeleni mali. Brihostibarnü pa nem notice ka agü tsü saka pa temang majung. Asü ng pa police matsü ngdangi oa kuli agü tsü tsü," ta metetdaksü.

J&K nung tensa majungba ya Centre ajanga lir: Mehbooba Mufti

Srinagar, October 08 (Agencies): Centre nung BJP-i aniba sorkari mera tai agiba ajanga Jammu & Kashmir nung tensa tamajungba akü mer, ta Hokolbarnü PDP Tir aser taoba mapang Chief Minister, Mehbooba Mufti-i metetdaksü.

Hokolbarnü lai kiralongrartemi khasetba school principal'er kibong semdanga liasü. Brihostibarnü Srinagar nung kiralongrartemi sorkar school ka nung principal Supinder Kaur aser tesayur Deepak Chand na khaseta liasü.

Kaur'er kima osangbenertem den jembidang lai, "Anogo shia tensa tamajungba akü mer aser iba ya BJP sorkar tai ajanga lir. August 5, 2019 nü Arrla 370 agienba mapang nungi tenzü ka parnoki mera tai agiba ajanga Kashmir nung kanga kera tensa tamajungba akü mer," ta aitsü.

Peoples Democratic Party (PDP) Tirisa, "La tanur tila ana lir, parnok kongi aotsü? Sikh adianu onok den liasü aser onok timtemba mapang ajak nung onok nungita liasü. Parnok anema inyakba ya sashia aitsü tsü tetemü," ta ashi.

Ano tanga osang ka nung, Hokolbarnü National Conference (NC) tatong Tir aser taoba mapang Chief Minister, Omar Abdullah-ia, tawa Jammu & Kashmir nung civilian tem kanga tepsetba ya lokti balala tsü ngda rara adokdaksü tsü atema lir, ta ashi.

School principal asür

Supinder Kaur'er ki semdanga sü len osangbenertem den jembidang Abdullah-i ketdangsertemi aibelenertem pua marutetba atema aitsü.

"Amakba kanga bulua ataloker, aser tanü yangi nisung ajaki pei takü m atema tsü bur. Yangi Muslim nungera amaker, Kashmiri Pandits aser Sikh nungera amaker," ta pai ashi.

"Iba ya politics asayatsü mapang ka masü, yimtenren tsü tsü tajangzü k angutsü atema ni yagi aruba masü saka yimsü sürtemi nü burtem nem tashimaitji kechiar angatetdaksü tsü la," ta paisa shisem.

Jammu & Kashmir nung civilian tem, talisa minority Hindu aser Sikh nunger kanga tepsetba anema Hokolbarnü Srinagar, Jammu aser linük tesem kar nung longkak aita liasü.

Srinagar nung longkak aitba sentongtem nung Pakistan nung kiralongrar telok The Resistance Front (TRF) anema yimyim ayim. Sikh nunger noklang aikati 'onoki ochi temeden aginer' ta ayimdena principal, Supinder Kaur tasü mang bener mangyima jaja.

Jammu nunga Jammu & Kashmir Peoples Forum-i Pakistan anema longkak aita liasü.

Yimetenren party ajaki Srinagar nung tesayur ana khasetba aitsü ba den kü lemi aibelenertem tekaraba nung aputsü la, ta takhangba agü tsü.



October 08, 2021 nü Chandigarh nung Punjab Chief Minister, Charanjit Singh Channi-i Haryana Chief Minister, Manohar Lal ajurudang tangokba noksa nung angur.

India nung ano nisung 21,257 dak Covid putet

New Delhi, October 08 (Agencies): India nung ano nisung 21,257 dak coronavirus putet aser iba tashidak agi shiranger 271 sü ogo, ta Hokolbarnü Union health ministry-i metetdaksü.

Tang tashi nung iba tashidak agi shiranger shilem 97.96 anepogo aser tang teshirangdakpur 2,40,221 lir aser ibaji coronavirus caseload nungi shilem 0.71% dang lir.

Tesü ba ghonda 24 tsü ngda coronavirus agi shiranger 271 asü ba densema tang tashi nung iba tashidak agi asür 45,01,27

jungogo, ta Union ministry of health & family welfare-isa metetdaksü.

Tesü ba ghonda 24 tsü ngda shiranger 24,963 anepogo aser tang tashi nung nisung ajak senteper 3,32,25,221 anepogo.

Tang anogo shia coronavirus positive putetba shilem 1.53 lir aser hopta shia positive putetba shilemji 1.64 lir, ta Health Ministry-isa metetdaksü.

Tesü ba ghonda 24 tsü ngda coronavirus vaccine dose 50,17,753 agü tsü ogo aser tang tashi nung vaccine dose crore 93 (93,17,17,191) agü tsü ogo.



October 08, 2021 nü Varanasi kü bok Assi ghat nung Department of Fisheries-i ayongzü kba River Ranching programme nung CRPF sepaitem adenba noksa nung angur.



Baghdad, Iraq nung police tanishir kati parliamentary elections agitsü anogo ana lia October 8, 2021 nü vote agütsüba sülen tangokba noksa ka yangi angur. Deobarnü election agitsü lia Hokulbarnü vote agütsüba nungya security forces, tepuokdak alirtem aser lendong timtem balala mechi pei ki yutsür linük telungzük nung tesem balala nung prokshia alirtem shilem agiogo. Iraq nung parliament menden 329 atema nüburtemi Deobarnü vote agütsütsü.

Nigeria nung pua bener oa alir nisung 200 jungnüa kumzük

Abuja, Mongputeni/Oct. 08 (Agencies): Nigeria northwest tsütsü arem min nung security agents temi mapa tamajung inyaker teloktem indang camp mita aoba mapang tashiyim agi pua aliba nisung 200 jungnüa kumzük, ta police temi ashi.

Prangbong-injang peria bena aliba mapa tamajung inyaker teloktem dang yangji alirtemi bandits ta ajar aser item telok yagi küm aika Nigeria northwest aser central nung timtem balala agüja arur, yimsüngtem amaker aser osettsüset bener aor, aser sen agi alangdaksütsü mechi nisung apur.

Pua alirtem kumzükba nung tetsür, tebur aser tanurtem ajak agi nisung 187 liasü aser parnok ya Zamfara state nung chiok, kong parnok ya bandit temi mapang balala nung timtem agütsüba mapang pua bener oa liasü, ta police temi Brehostibarnü menur ashi.

Police temi media balala nung noksa aser video prokshiba nung nisung kar süoshi teraksa agir liasü aser karbo kidangi anir aotsü atema gari ataba mapang amentsüa

timtema liasü. "Ghonda aika bushiba aser kumzükba operations agiba sülen pua alirtem ya talenba kecha melie chiokogo, shirnok hopta aika pua yua liasü," ta Zamfara state police odongtar Mohammed Shehu-i sangdong ka nung ashi.

Zamafa asr danga northwestern state tem nung mitkartemi hopta junga operation agiba mapang parnok ya kumzük. Iba operation agiba mapang bandit tem osang-tsüsang agitepba nung timtem agütsütsü mechi telecom tem shibanga liasü.

Item telok yagi Zamfara, Katsina, Sokoto aser Kaduna state tem nung aliba arem min nung miima camp yanglua lir, aser parnoki kakat reju tem nung tali tenük yoker lendong agütsür aser senotsü agi alangzüksü atema kakatshirtem pua bener aor.

December ita nungi tenzüka school tanurtem noklang aika pua bener ogo. Parnok timba chiokogo mesüra senotsü agi alangzükogo, saka ano aika parnoki pua yua lir.

Afghanistan: Kunduz mosque nung bomb pokloktsü, aika asü

Kunduz, Mongputeni/Oct. 08 (Agencies): Afghanistan northeast tsütsü Kunduz yimti nung Hokulbarnü sarasademba mapang bomb tesashi ka apokba mapang nisung aika asü, ta Taliban-i ashi.

"Tanü nikongdang Shia nunger mosque ka nung bomb tesashi ka apok aser iba lendong nung külem senso aika takum sama aser yiru," ta Taliban odongtar Zabihullah Mujahid-i Twitter nung ashi. Iba lendong bushisüngdangtsü atema special unit ka arua tongogo, ta paisa ashi.

Iba lendong nung nisung 15 asü aser aika yiru, ta health

ketdangtsür kati osangbener dang ashi.

"Onoki yirur aliba nisung 90 dak tema aser tasü mang 15 agizükogo, saka iba dang nungi timba akumtsü akok. Tang tashi iba lendong ajurur alirtem agizüker," ta Doctors Without Borders (Medecins Sans Frontieres, or MSF) hospital nung inyaker kati ashi.

Taliban ketdangtsür katibo iba lendong nung nisung tajemba agi 28 asü aser aika yiru, ta osangbener dang ashi, saka pa tenüng memettdaksü.

Kunduz yimti nung alirtemi osangbener dang ashiba agi, Hokulbarnü sarasademba

mapang mosque nung bomb ya apok.

Ali nung azü agi yimbanger nisung tasü mang longdaka aliba noksatem social media nung prokshia liasü. Ano video ka nung teburtemi tetsür aser tanurtem densema iba tesem nungi nüburtem anizüker aoba nguogo.

Iba lendong agütsüba ya telok katia tenüng agia mali.

Tawa Kabul nung aliba mosque ka densema tesem balala nung iba ama lendong kar atalokba angur, aser item ya karbok ISIL (ISIS) den sendaktepa aliba telungpur temi tenüng agiogo.

Maria Ressa aser Dmitry Muratov nati 2021 Nobel Peace Prize nguogo

Oslo, Mongputeni/Oct. 08 (Agencies): Philippines nungi osangbener Maria Ressa aser Russia nunger Dmitry Muratov nati 'freedom of expression' wazüka ayutsü merangba atema taküm indang Nobel Peace Prize takok ngutetogo. Alima tesem ajungalen pei bilemba lemsatepba temeden ya sadema mamshiteter, ta iba sempet agütsüba committee ajanga ashir.

Tenati Philippines aser Russia nung tasü ita freedom of expression atema raraba mechi iba konang ya agütsü, ta Norwegian Nobel Committee mendenpuba, Berit Reiss-Andersen-i Hokulbarnü ashi.

"Kasa mapang parnok ya osangbener ajunga tenüng nung lir, shirnoki alima nung iba atema inyaker, kong democracy aser freedom of press atema tensa tamajungba kuma aoba mapang lir," ta lai Norway yimtiba, Oslo nungi osangbener dang ashi.

1935 küm German nunger Carl von Ossietzky-i par linük nung rara sülen miima yangluba rearmament programme temai adoktsüba atema agütsüba sülen osangbener nem iba sempet ya taküm mezüngbuba agütsür.

"Talenba aser tenokdangba mali aser ochi nung ajemdaker osang abenba ajanga tim masüba nung tashi amshiba, tiazü aser rara indang olulu nungi kumzük," ta Reiss-Andersen-i ashi.

Ressa yagi investigative journalism website Rappler



Philippines nungi osangbener Maria Ressa (abelen) aser Russia nungi osangbener Dmitry Muratov (achichi) nati 2021 Nobel Peace Prize nguogo. Tenati pei linük nung 'freedom of expression' kumzüka ayutsü asoshi nokdakba atema Hokulbarnü iba konang sempet ya agüja liasü.



tenzüker aser la mapa ya timba Philippines Tir Rodrigo Duterte-i mangatetep adoka temesepba mozü anema raraba nung ajemdaker lir.

"Tanü ama osangbenba ya kodanga tongtipang meliasü. Osangbener tem technology sabang nung tashi samaogo anungi linük anunga lungjemer osang tiazü tali akuma anendaksütsüla," ta Ressa iba sempet anguba indang osang angashiba sülen ashi.

La indang news website ya anogoshi shibangtsütsü ama tensa nung liaka lai maneni ochi osang abentsü meranger, ta lai ashi.

"Nai North Star ya nü jakdang yura, nai ochiba wazüka ayur, ochi tashi nai

amer. Philippine Constitution nung aliba temeden nai amshir. Ibaji onoki inyaker aser ibaji onoki maneni inyaksü," ta Ressa-i ashi.

Muratov-i 1993 küm Russia nunger osangkaket Novaya Gazeta tenzüker aser pa ya küm 24 tashi editor-in-chief inyaka arur. Russia nung parnok ama independent media outlets aikabo mali aser iba mapang par osangbener trok tashi tepsetogo.

"Iba atema ni tenügang magitsü. Ibai Novaya Gazeta indang lir. Nüburtem indang 'freedom of speech' wazüka ayutsü merangba mapang asürtem indang lir," ta Muratov-i ashi.

Iba osang sangdonger

mapang tatsüka tsüngta Kremlin-i Russia nunger osangbener nem tenügang agütsü, ajisüaka pa indang osangkaket yagi aiben Russia ketdangtsürtem aitsür.

"Asenoki Dmitry Muratov nem tenügang agütsüti. Pai angatetba ama pai tanen Makai inyaker, pai nendaka inyaker, pa dak sempet lir aser pa tasü tait lir," ta Kremlin odongtar Dmitry Peskov-i osangbener dang ashi.

Committee to Protect Journalists ajanga ashiba agi, tesüiba küm ter tsüngta Philippine nung media balala nung inyaker nisung 17 aser Russia nung nisung 23 tepsetogo.

Taoba küm iba sempet ya World Food Programme nem

agütsü, shirnoki alima nung nüburtem ayaba aser food insecurity samadaksütsü meranga inyaka liasü.

Iba sempet nungya gold medal ka den sen Swedish kronor 10 million (USD 1.1 million dak tali) agütsür. Iba senpet ya Nobel Prize tentetsang Swedish inventor Alfred Nobel-i pa 1896 nung masü dang zülua yutsüba pa indang rongsen nungi agütsür.

Hombarnü Nobel Committee ajanga Nobel Prize in Physiology mesüra Medicine sempet ya America nunger David Julius aser Ardem Patapoutian na nem agüja liasü.

Taküm Nobel Prize in Physics ya scientist asem nem Mongulbarnü agütsü, shirnoki tzü-mopung melenshiba tali angatetba densema alimar yimya tepenja takzütetba nung yariysüsa inyaktet.

Benjamin List aser David WC MacMillan nati Nobel Prize for Chemistry sempet nguogo, ta Bodhbarnü sangdonga liasü. Tenati mozü aser ayi mozü densema compounds tem yangluba nung amshitsü molecules tem temürekba aser temelaba nung yanglutettsü yimyatem bushiteta liasü.

Nobel Prize for Literature ya Brehostibarnü Tanzania nunger kakat zülur Abdulrazak Gurnah nem agütsü.

Ano economics wadang nung alakteta inyakba atema iba sempet ya Hombarnü agütsütsü lir.

50th Congratulations!! Wedding Anniversary



9th Oct. 1971



9th Oct. 2021

Mr & Mrs. Waitemjen Longkümer

Mkg kübok block balala nung training agiogo

Mokokchung, Mongputeni/ October 08, 2021 (Agencies): Mokokchung District kübok Alongkima, Tsurangkong, Tuli, Changtongya, Ongpangkong aser Mangkolemba block tem nung September 21, 2021 nungi October 07, 2021 tashi IHIP (Integrated Health Information Platform) nung Health Care Workers indang Re-Orientation Training agia liasü, ta sangdong ajanga metetdaksü. IDSP ajanga iba training

ayongzük aser training nung shisalen sayurji Angelina Jungi, Surveillance Coordinator, NISHTHA, Jhpiego liasü. Chief Medical Officer-i, IHIP Portal nung 'S,P,L forms data reporting' inyakyim tajungba melenshitsü atema iba training ayongzük, ta metetdaksü. Iba sentong nung training agirtem dang, IDSP paper based reporting nungi IHIP (Integrated Health Information Platform)- Case Based

Surveillance, Shirangba aser tasüba osang agütsüba inyakyim, event alert generation aser Outbreak investigation maparen agi melena inyakatsü asoshi tesayuba agütsüogo. Health Care Workers 60 shi iba training nung shilem agiogo. Training agir rongnung Medical Officers, CHOs, ANMs, Pharmacists, Lab. Technicians, LDAs aser Medical attendants tem dena liasü, ta kasa sangdong nung shia lir.

Aryan Khan o Arbaaz Merchantt na Arthur Road Jail nung yua lir

New Delhi, Mongputeni/ October 08, 2021 (Agencies): Shah Rukh Khan'er jabaso Aryan Khan aser pa den külemi pua alir nisung tenet tashi judicial custody nung yur anogo ka sülen, Hokolbarnü (08.10.2021), parnok ajak Arthur Road Central Jail-i yokogo. Parnok den külemi apur tetsür ana - Munmun Dhamecha aser Nupur Sarika naprongla Byculla Women's Jail nung yua lir. Kasa mapang Aryan, Arbaaz Merchantt, Vikrant Chhoker, Ismeet Singh, Mohak Jaswal aser Gomit Chopra densema tangartem ARCJ nung yua lir. Parnok bail ajanga chioxtsü temelaba magütsü tashi, pua alir ajak pei pei tata jail nung ayutsü. Pua alirtem indang lawyer aser Narcotics Control Bureau advocate temi parnok nem bail agütsütsü asoshi inyaka liasü, saka court ajanga bail magizük.

Aryan Khan, shiba temesepba mozü benshiba dak sendakba nung pua lir, pa indang bail, court ajanga magizük. Iba ken o dak sendakba nung Aryan den külemi apur tem talisa Arbaaz Merchantt, Munmun Dhamecha aser tangartem Arthur Road Jail nung anogo 3 nungi 5 tashi quarantine cell nung puoka ayutsü. Advocate Ashwini Achari, shibai Arbaz Seth Merchantt atema iba ken o nung inyakdar, pai ashiba agi, "Court-i iba bail application magizük, kechiyong tang tangbo iba application ya magizük tetsüla. Ajiasünung, onoki session court nung bail plea' ka file asütsü." Mumbai coast tsütsü cruise ship ka nung party ka mita aoba sülen, temesepba mozü apuba dak sendakba nung, Nigeria nung ka densema iba ken o nung nisung 18 pua lir. October 03, 2021 nü iba cruise ship nung temesepba

mozü putetba dak sendakba nung Aryan-a pua liasü. Brehostibarnü (October 7), Mumbai magistrate court-i, pua alir nisung tenet dak alaka, Aryan Khan ya anogo 14 tashi judicial custody nung ayutsü asoshi tetuyuba agütsü. Iba sülen, Aryan indang lawyer Satish Maneshinde-i bail plea ka file asü. Additional Chief Metropolitan Magistrate R.M. Nerlikar-isa iba ken o dak sendakba nung ano jembishinütsü atema Special NDPS Court nung iba ken o agütsüogo. Brehostibar aonung Aryan Khan densema pua alir nisung 8 shi NCB-i RT-PCR test agiogo. Iba sülen, Hokolbar anügang 12:00 meta parnok ajak okadaki anir ao. October 02, 2021 nü Cordelia Cruise nung party agiba mapang, NCB ajanga iba cruise ship mita ao aser Aryan den nisung tenet apu.

Pelaba Lemsateper



ASO : 1910 - ASÜ : 06/10/2021

Onoki kanga dang meima aliba ojala **Akangkoka** (Kangtsüng), Oct. 06, 2021 anogo nung akümüli wadang tempanger teti alitsü limai ogo.

Ojala küm 111 tashi arishia lir, la arishi tempangba anogo tashi nung Kiyonger, Yimtsür yimer, Tembartem, Kija-Kibong, Arogo, Yimten aser Lokti balala shirnokisa, ozü asüko mapang nung nübo, rongsen aser sarasadem den maparen balala nung yaritepogo, nenok ajak dang kangasa pelaba lemsateper.

Nenok temeim aser mapa tajung asoshi, tanü ozüi nenok nem kecha meyipba magutsüteter, saka tematiba Tsüngremi nenok ajak moshia moajangma ta ozü sarasadem.

- Temeim Kinüngertem.

MAMATETER

Onoki teti meima aliba Oba... Na iba akümüli toktsür tanü küm ka abensar. Oba onoki na bilemteter. Onok taküm asoshi na tesangwa ka liasü, saka tanü iba tesangwa lemsateper mali kümogo. Saka na Kibuba den lir ta onok mulung anisüngzüker. Oba tanü onoki na bilemteta sarasadema akümtsübu agüja amonger.



Obala asür Marsotet Lkr, (Longkong) Tasüba : 9 Oct 2021

Temeim Chirur, Semchirtem aser kinüngertem

OFFICE OF THE SENSOLIKUM (B) VILLAGE COUNCIL DIMAPUR : NAGALAND METETDAKTSÜR

Sensoliküm (B) yimden ajanga kanga taongtipang nungdak ka yamai metetdaksür. Sensoliküm (B) yimer litsü nung memeteba aser mangateter kari danga terenlok mapa anyaka lira, anenangta Sensoliküm (B) yimden terenemba metetdaksür.
Sd/- Sungjem President, Sensoliküm (B)
Sd/- (T. Lanuchuba Jamir) Secretary, Sensoliküm (B)

Election Obeserver ana Tuensang tongogo

Tuensang, Mongputeni/ October 08, 2021 (TYO): 58-Shamator-Chessore Assembly Constituency atema Bye-elections dak sendakba nung, Brehostibarnü (07.10. 2021) General Observer aser Expenditure Observer naprongla Tuensang tongogo, ta sangdong ajanga metetdaksü. Aruya aliba Bye-elections m a p a r e n / i n y a k y i m reprangshima aser asadangshitsü atema General Observer-i 58- Shamator-Chessore Assembly Constituency semdang aser Brehostibarnü, candidate tem file nomination asüba mapang, General Observer dena liasü. DC Office chamber, Tuensang nung, Deputy Commissioner & District Election Officer, Tuensang-i Observer anaprongla dang iba constituency nung Bye-election ketdangsia agitsü atema renemshiba maparentem tongmelang agi metetdaksü aser

DC-i tena nem District Election Management Plan agütsü. Bye-elections dak sendakba nung, General Observer aser Expenditure Observer naprongla Circuit House, Tuensang indang Room No.1 aser Room No.2 nung anenzüka lir. Bye-elections agitsü aliba dak sendakba nung telangzüba/tebilemba/tashishitsü kar danga lira, working hours mapang tim Obeserver den tongteprateptsü akok. Iba dak sendakba nung nüburtemi osang-ola agitsü asoshi Observer anaprongla indang tejangatem yamai asütsü.
1. General Observer: Nagarajan M, IAS Address: Room no.1, Circuit House, Tuensang Mobile: 09978401936 Landline: 03861-220244
2. Expenditure Observer: R.A. Dhyani, IRS Address: Room no. 2, Circuit House, Tuensang Mobile: 09969236580 Landline: 03861-220172



Addl. Director Food & Civil Supply, asür Sentirenla Lkr, la 13th July, 2021 anogo iba akümüli toktsür aoba anogo nungi tenzüka temeimertemi tenla bendentsüba senotsü agi kinüngertemi la nungo Mokokchung leper nung semtu ka yanglutsüba Oct 7 nü Mokokchung ADC & MMC Administrator, Shashank Pratap Singh (IAS) ajanga lapoktsüdang tangokba noksa nung angur. Iba semtu Mokokchung Town Baptist Arogo (MTBA), Associate Pastor, Rev. Temsüwati Kichu ajanga meshiteta sarasademtsü. Mokokchung, October 8, 2021.

World Cup Qualifiers: Brazil-i goal 3-1 agi Venezuela kokogo

Caracas, Mongputeni/October 08, 2021 (Agencies): Sangküm 2022 World Cup atema qualifying asayamung nung Brazil aser Venezuela na asaya liasü. Caracas yimti kübok Estadio Olimpico de la UCV stadium nung team ana tsüingda asaya mapang, Brazil pur goal 0-1 agi Venezuela tesülen ser asaya liasü, saka parnoki goal asem tashi idakja goal 3-1 agi iba asaya koktet.

Taoba World Cup qualifier asayamung asaya 17 tashi nung Venezuela-i Brazil pur khen danga kokdanga mali, saka taküm qualifying nung, team anaprongla asaya tenzüker minute 11buba nung Eric Ramirez-i mezüing goal idaktsüba sülen Venezuela puri teimla tulu yur asaya liasü.

Brazil defender Fabinho aser Marquinhos nati ball azüoktsü makokba sülen, Yeferson Soteldo-i metsüketa yokba cross ball ka Ramirez-i agizüka Venezuela atema goal inoktsü.

Iba goal sülen, telok kati dang meinoktsüteti Venezuela goal 1-0 agi Brazil tejakdang ser mezüing half tembangadok. Ajisiüaka, tanabuba half nung Brazil puri goal asem tashi idaktsütsü maongka angu.

Iba asaya atemtsü lia, Brazil team nung mezüing asayasang Antony-i (90+5) goal tasembuba aser Gabriel Barbosa-i minute 85buba nung penalty ajanga tanabuba goal meinoktsüdang, minute 71buba nung Marquinhos kolak agi Brazil atema mezüing goal idakja team anaprongla



Caracas, Mongputeni/October 08, 2021: World Cup Qualifiers asayamung nung, Brazil aser Venezuela tsüingda asaya mapang, Brazil nung Gabriel Barbosa-i penalty ka idaktsür sülen pelaba yangi noksa nung angur.

goal 1-1 kümadok.

"Iba asaya kanga tasak liasü, tanabuba half nungi team-i junga asaya tenzüker. Onoki iba amala tensa aiben ajangshidanga lir," ta qualfier asaya tuku nung Brazil-i asaya tukububa takok anguba sülen, Marquinhos-i ashi.

"Takok tajung angutsü tasak, saka takok dak aika sendaktepba lir aser team atema ibaji kanga dang tongtibang. Tanabuba half nung asaya yimyattem aser takok angutsü asoshi onoki junga shilem agiba ajakji team ka ama asayaba sayur; aser ajak atema iba asaya tatishitsü tuluka asütsü," ta pai ashi.

Kasa qualifying asayamung nung Argentina aser Paraguay na draw - goal 0-0 nung

tembangba ajanga, South American qualifying group nung Brazil-i temaba jenjang tongtetogo. Tang, Brazil-i point 8 shi ngua lir.

Qatar atema group shia nungi temaba jenjang ajangzükter team pezü tashi indang indanga qualify asütsü aser pungobuba jenjang nung tembanger team tem inter-regional playoff nung asayatsü.

Venezuela aser Brazil na qualifying match nung, asaya nungi mapang tatsüka atema agiener alisang aser Brazil nung asayar tongti Neymar masaya. Kasa qualifying match nung, Gabriel Jesus asaya liasü.

Taküm July ita, Copa America quarter-final nung Brazil aser Chile na asayaba mapang, Gabriel Jesus asaya

nungi tukudaktsür külen nungi iba qualifying match nung Brazil atema mezüing asayar asütsü.

Ajisiüaka, tanabuba half tenzüker Brazil team nung substitute asayatem anioka shilem agidaktsüba yong, pungoben World champion Brazil pur asaya nung temelenshi tulu adokdaksü.

Leeds United club nung mezüing asayasang, Raphinha-i Brazil atema goal maongka lapoktsü aser pai corner kick ka metsüloktsü, koba Marquinhos-i team atema mezüing goal inoktsü. Kasa asaya nung, Vinicius Jr-ia tongti shilem agiba yong Barbosa-i penalty ka ajanga tanabuba goal idaktsü. Mapang talila apuloktsür asayadang, asaya atemtsü lia Raphinha-isa külem asayar aser

substitute Antony yaria liasü aser ibaji ajanga Antony-i mezüing international goal aser Brazil atema goal tasembuba bendenlokja liasü.

*** Ecuador-i Bolivia madak goal 3-0 agi takok angu.**

Kasa asayamung asaya tanga ka nung, Ecuador-i goal 3-0 agi Bolivia tsükdaktsüba sülen, group nung tasembuba jenjangi tuogo.

Iba asaya nung, Michael Estrada-i minute 14buba nung Ecuador atema mezüing goal idaktsü aser tatsüka dang lir Ener Valencia-i minute 17' aser 19buba nung goal ana tashi atonga inoktsü. Iba group nung Ecuador puri Uruguay ajangeta tasembuba jenjang tongteter asütsü aser parnok point asem agi tanabuba jenjang nung alir Argentina tesülen lir.

*** Chile-i goal 0-2 agi Peru makok.**

Asaya tanga ka nung, Peru-i goal 2-0 agi Chile tsükdaktsü. Iba asaya nung, Peru atema Christian Cueva-i minute 36buba nung mezüing goal idaktsü aser tanabuba half tenzüker minute 64buba nung Sergio Pena-i Peru atema goal tanabuba idakja par teloki goal 2-0 agi Chile koktet.

World Cup asayamung nung tanabenbuba asayatsü teimla tulu nung Peru team-i iba qualifying asayamung nung junga shilem agidar. Team 10 dena aliba table nung, Peru-i point 11 nguogo aser group nung parnok jenjang tenetbuba nung lir.

Nations League: France-i Belgium koka final tongtetogo



Turin, Mongputeni October 08, 2021: Nations League semi-final nung France aser Belgium tsüingda asayaba mapang, Theo Hernandez-i France atema goal tasembuba idaktsür sülen, külem team pur pelatepba yangi noksa nung angur. France-i Belgium madak goal 3-2 agi takok ngua iba league final tongtetogo.

Turin, Mongputeni/October 08, 2021 (Agencies): Brestibarnü, Nations League semi-final nung France aser Belgium na asaya liasü. France-i goal 3-2 agi Belgium tsükdaktsüba sülen, Les Bleus

pur iba asayamung final tongtetogo.

France aser Belgium napronglai goal 2-2 idaktsür sülen telok kati danga goal talila meinoktsüteti aliba mapang, asaya tatemlen minute 90buba

nung Theo Hernandez-i telok atema goal tasembuba idaktsü.

Allianz Stadium kübok iba asaya mezüing half nung France pur goal 0-2 agi Belgium tesülen ser tembangba sülen, tanabuba half nung Karim Benzema-i

minute 62buba nung goal ka aser minute 69buba nung Kylian Mbappe-i penalty ka idaktsü.

International asayamung nung, France atema AC Milan nungi full-back asayar Hernandez-i tanabenbuba asaya liasü aser iba League nung pai France atema mezüing goal idaktsür asütsü.

Deobarnü San Siro, Milan kübok Nations League final nung Didier Deschamps'er teloki (France) La Roja (Spain) den asayatsü.

"Iba asaya akokba ajanga, team dak sempet aser temolungtetba tulu aliba sayur," ta asaya temer sülen Deschamps-i ashi.

"Half-time sülen parnoki yamai junga asayatsü ta shingaia bilema meliasü, aser score (Belgium pur goal 2)

repranger sülen team-i iba tashi asayatsü meimla, saka parnoki tezü metangi asayaogo aser final tongtettsüsa team puri iba asaya koktet," ta pai ashi.

Mbappe, shiba France atema International asaya 50 tashi nung shilem agir rongnung tanubusang aküm, Nations League semi-final final nung, pai-a goal ka idakja liasü.

Iba asaya mezüing half matongdang, Belgium atema Carrasco-i minute 37buba nung mezüing goal inoktsü. Minute asem sülen, Lukaku, shibai taoba hopta kasa stadium nung Premier League Club Chelsea den junga masayatet, pai Belgium atema goal tanabuba bendenloktsü.

International asayamung nung Lukaku-i Belgium atema goal trokbuba idaktsür asütsü.

BILEMDANGANG

"Nisung kaji kopika arishia lidir, shisatsü nung tabensa akümer."